



12. august 2011
4. januar 2011

UKA 2011/30
UPA 2011/70

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

Meeqqat atuarfiat pillugu inatsisip allanngortinneqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni tuluit oqaasii danskit oqaasii naligalugit minnerni aallartittumik atuartitsissutigineqartalersillugit.
(Inatsisartunut ilaasorta, Doris Jakobsen Siumut)

Tunngavilersuut:

Nunatsinni kalaallit oqaatsigut tassaapput inuiaqatigiissutitsinni pingaarnarpaat, qaqugorsuarmut ataqqillugit kinguaatsinnut ingerlatittuagassagut.

Danmarkimik naalagaaffeqateqarnitsinni qallunaat oqaasii oqaatsitta aappaattut atulersimavagut ilinniagaralugillu.

Tuluit oqaasii, nunarsuarmioqatitsinnut pingaarnarpaatut attaveqaataasut, oqaatsit pingajuattut ilinniagaraagut.

Danmarkilu naalagaaffeqatigiinnerput tunngavigalugu isumaqatigiissutillu malillugit ilinniartorpassuit qallunaat nunaannut ilinniariarlutik aallartarput, taamaattoq nunanut allanut ilinniartitaanikkut suleqateqarnerput qujanartumik sulii annertusiartorpoq.

Nunarsuarmi sumiikkaluaraanniluunniit ilinniartitaanikkut ilisimatusarnikkut allarpassuartigullu tuluit oqaasii annertunerpaamik aallaaviullutik atorneqartarput, qallunaalli oqaasii piffinni ikittunnguani kisimik atorneqarsinnaapput.

Atorfinititsinikkut nunanit allanit nunatsinnut tikisitat qallunaat nunaanneersuuneruserput aamma naalagaaffeqatigiinnerput tunngavigalugu. Ukiunili aggersuni nunanit allaneersut tuluttut oqaaseqartut aamma merliartorput sulilu amerliartussallutik.

Oqartoqartarpoq ilinniarniaraanni qallunaat oqaasiinik piginnaasaqarnissaq pisariaqartoq, Atuarfitalammii ilinniarniaraanni allani atuakkat atuartitsissutit ilinniartitsissutillu amerlasuut qallunaatuujunerat tunngavigalugu aamma qallunaat nunaannut ilinniarniaraanni qallunaatut oqalussinnaanissaq paasisinnaanissarlu pisariaqarmat.

Nunarsuarmi atuakkat meeqqanut atuartitsissutit ilinniartunullu ilinniartitsissutit tuluttut allasimasut siuarsimasorujussuupput soorlu aamma qallunaat nunaanni ilinniarniaraanni ilisimatusarffinnilu tuluttut oqaatsit pingaaruteqartorujussuusut atugaasorujussuusullu.

Inerisaaviup nittartagaani takuneqarsinnaavoq 2009-mi atuarfimmi inaarutaasumik tuluttut misilitsinnermi oqaluttariarsornikkut allattariarsornikkullu misilitsinnerit agguaqatigiissillugit

inerner. Atuartut tuluttut oqaluttariarsornermi agguaqatigiissillugu 6,96-imik karaktereqarsimapput allattariarsornikkullu 6,26-imik karaktereqarsimallutik. Angusat ataatsimut isigalugit naammaginangitsutut oqaatigisariaqarput, taamaammat apeqqusertariaqalerparput, ilumut tuluit oqaasii oqaatsit pingajuattut meerartatsinnut atuartitsissutiginnarniarnerigut.

Inuiaqatigiit kalaallit nalilersueqqittariaqalerpugut. Hawaiiimi meeqqeriveqarpoq oqaatsinik assigiinnngitsunik pingasunik atuiffiusumik, meeqqat taakku inersimaneruleraangamik angusarissaartartut oqaatigineqarpoq, soorunami tamanna assut uatsinnut soqutiginaateqarpoq.

Inatsisartunut 2002-mili qinigaagama arlaleriarlunga una siunnersuut qaqittarnikuuara ulloq mannali tikillugu siunnersuut pillugu amerlanerussuteqartunik katersuisinnaassimangilanga. Ukioq manna qaqeqqinniarlugu aaliangerpunga, nuannaarutigisannik Demokraatit uattuulli isumaqalersimasut maluginiarakku, tassami 2010-mi Inatsisartut ukiakkut ataatsimiinneranni Demokraatit siunertaq aamma tamanna isumaqatigigaat paasigakku. Taamaammat maannakkut neriulluarpunga, kiisami amerlanerussuteqartunit siunnersuut ilalernerqarumaartoq.

Taamatut tunngavilersuuteqarlunga siunnersuutigaara, Atuarfitsialammi tuluit oqaasii qallunaat oqaasiitulli aallartittumik atuartitsissutigineqartalissasut.

Siunnersuutip aningaasatigut kingunissai

Siunnesruutip akuerineqarneratigut atuakkanik pisissutissanik aningaasaliisoqarnissaa ilamanaateqarpoq. Tutsuiginartumik naliliisinnaaneq Inatsisartut atuartitsisalenissap qaqugu aallartinneqarnissaannik isumaqatigiinnerannik tunngaveqassaaq, tassami Inatsisartut aalajangiinerisisugt atuartut qassit tuluttut atuartinneqartalissanersut inissinneqartussaavoq. Soorluttaaq aningaasatigut kingunissai ilinniartitsisunik amerlanerusunik atorfinitsitsinissaaq apeqqutaalluni aalajangerneqartussaasoq.

Siunnesruutip allaffisornikkut kingunissai

Siunnersuutip akuersissutigineqarneratigut soorlu taasissutissartaani maluginiarneqarsinnaasoq inatsimmik allangortitsinermik tuluttut atuartitsisarnerup qaqugukkut aallartittarnissaannik aalajangiisuusumik kinguneqassaaq. Taamaattumik allaqussinnaanngilarput allaffisornikkut AC – inuup ataatsip ukiumoortumik suliarisinnaasaasa naatosroneqarnerani atuisoqarnissaa inatsisip naleqqussarneqarnissaannut, soorluttaaq inatsisip naammassillugu suliarineqarneernerani nutsierisumut aningaasartuutearnissaaq ilimagineqartariaqartoq.

Siunnersuutip namminerorluni suliffiutilinnut aningaasatigut allaffisornikkullu kingunissai

Siunnersuutip akuerineqarneratigut namminersorluni suliffiutilinnut toqqaannartumik kinguneqarnaviangilaq.